

REGIONAL NEWS

MIGOSTU STIR

Mizoram sawrkar sikul zirtirtu inzawmkhawm chuan sawrkar laka an lungawilohna lantir na'n naktuk atanga Zirtawpni thleng khian an hnathawhna hmunah "pawntthem dum" an bel dawn.

Mizoram sawrkar school zirtirtu inzawmkhawm chuan sawrkar hmasa in zirna in hrang hrang, dinhmun sang zawka a hlankai te tun sawrkarin dan siamthat ngai leh fello chhuanlama a paih chu sorkar sikula dah let an phut an tih an sawi a, sawrkar laka lungawilohna hrang hrang tarlangin tunkar sikul kal ni zawng zawngah an hnathawhna hmunah an kawr hmaah pawntthem dum an bel vek dawn tih an sawi. Mizoram Govt. School Teachers Union (MIGOSTU) chuan sawrkar hmasa in dinhmun sang zawka zirna in a hlankaina chu tun sawrkar Cabinet thukhawmin a hnawl bakah High School leh Middle School Headmaster kum tam tak lo thawk te zirtirtu pangai a an tlak hniam theihna tur an rawn telh thar niin an sawi a, Cabinet thukhawmin a relte chu a rang thei ang bera ngaihtuah that leh ni se an duh thu leh provincialised status ah dah let an duh tih an sawi.

MIGOSTU chuan sorkarin tehfung a hmanah thingtlang leh khawpui inang renga an siam chu dik lo an tih thu sawiin, thingtlanga school te tan kaisan ve theihna a awm tawh dawn lo nia an hriat avangin dan thar an siam chu sut leh vat turin an phut tih an tarlang bawk.

<><><>

CSS

CSS hnuai a hlawh late chuan naktuk Thawhtanni atanga a huhova chawlh an tum chu an thulh.

All Mizoram CSS Employees Coordination Committee (AMCECC) thuchhuah tarlan danin, sorkar laka lungawi lohna an lantir mek chungchangah DP&AR Minister Pu K. Sapdanga, Adviser to CM (Political) Pu Lalmuanpuia Punte, Chief Secretary charge la mektu Pu H. Lalengmawia leh DP&AR hotute nen an thil phut hrang hrang sawi ho a nih hnuah an thil phutte tihhlawhtlin dan kawng dappui an tum thu an sawi avangin nimina AMCECC Executive Committee thukhawm chuan a huhova chawlh lak chu kalpui tul rih loah a ngai tih an sawi a. Sorkarin an lungawi tawkna ruahmanna tha tak a siam sak zel an beiseitih sawiin, hetih rual hian Sorkar hmalakna a vuaicha viau a nih chuan an awm zel dan tur chu Executive Committee in a rel leh dawn ni-in an sawi.

AMCECC thuchhuah chuan sawrkar nen an inbiakna-ah dah ngheh an nih theih dan turah ngaihtuahna thar siam a nih tur thute mumal taka lak te chu senior dan indawta luh theih dan tur bakah April ni 15 atanga ni 17-a Pen Down Strike an huaihawt chhunga hlawh cut tura sawrkarin a lo tih tawh chu sut leh tura chak taka hmalak a nih avangin a huhova chawlh an tum chu thulh an rel tatih an tarlang ani.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar puan leh a ni ang.

<><><>

FITNESS CHECKING

Aizawl District Transport office hnuaia Motor Vehicle Enforcement Staff-te chuan tun thla, April ni 1 atanga nimin thleng khan, lirthei document hrang hrang fel lo 302 manin, lirthei document 47 an hren sak.

MVI Enforcement staff-ten lirthei an endik zingah LMV lirthei ke pali nei-mimal car leh a dangte an man tam ber a, lirthei endik zingah document fel lo, chhiah leh Insurance fel lo bakah, driving licence nei lo leh fel lote an man tam ber a, khualzin phur Maxi cab 32 an man bakah bungraw phur chi lirthei te 60 an man bawk. Lirthei an man atanga pawisa an chawitir tlingkhawm chu cheng cheng nuai 11, aing 7 leh sang 4 a tling ani. MVI Enforcement staff te hian lirthei 1,057 an endik thu an sawi.

Document felfai nei lova lirthei khalh chhuah chu dan phal loh a nih bakah, chetsual an tawh palh emaw mi an tipalhin emaw insurance a hmuh theih loh thu an ti a, harsatna lian zawk an tawh theih avangin document felfai nen chauha lirthei khalh chhuak thin turin lirthei neitute an chah a ni.

<><><>

ASSAM RIFLES

Assam Rifles te chuan nimin khan an battalion hmunpui thar Zokhawsangah a thlawna inentirna hun (medical camp) an huaihawt.

An thuchhuahin a sawi danin hetah hian a bul hnai a cheng, an vai-in mi 65 an inentir a. Inentirte hi mipa 16, hmeichhia 46 leh naupang 3 an ni a. An natna endikna atana sum tam tak sen ngai lova ensak an nih bakah a thlawnin damdawi an sem bawk a. He ta kalte hi Assam Rifles chungah an lawm hle niin an thuchhuah chuan a tarlang.

Nimin vek khan Assam Rifles te'n Lunglei a Assam Rifles Public School (ARPS)-ah World Heritage Day lawmna chi khat atan essay inziahsia an buatsaih a. Intihsiakna hi hnam rohlu ngaihsan nachang hriat leh a venhim lama harh tharna atana buatsaih a ni a, zirlaite'n an hlut hle niin Assam Rifles thuchhuah chuan a sawi bawk.

<><><>

I&K CLOUD BURST

Jammu & Kashmir Ramban dist-a vawiina ruah bawhawk surah mi 3 an thi a, an zinga 2 chu naupang an ni. Vanduaina hi Seri Bagna-a thleng a ni a, nizan zankhua khan ruah leh thli bakah rial nasa takin a tla a, hmun engemawzatah lei a min bawk a ni.

Ruahsur nasa vangin Jammu biala Dharam Kund khuaah pawh chenna in 40 vel a chhia a, mi 100 chuang chhanchhuah an ni tawh a ni. Lei a tlak reng avangin National Highway hrang hrangte chu khar a ni a, khua a ziaawm a kawng thenfai fel anih hma chuan mipuite chu lirtheia chhuak lo turin thuneituten an ngen a ni.

<><><>